



QUÆSTIO MEDICA,

QUOD LIBETARIIS DISPUTATIONIBUS
manè discutienda in Scholis Medicorum die foris
vigesima nona Novembris.

M. JOANNE ANTONIO BOURGAUD,
Doctore Medico, Præside.

An in morbis melancholicis purgatio per inferiora?

I.

BLANDISSIMUM vitæ condimentum sanitas: absque eâ nulla naturæ, nulla fortunæ bona; longiùs ab eâ recedit qui mente laborat, quam qui ægrotat corpore. Cunctis hominibus eadem animæ perfectio. Ingenii varietas ab organorum conformatione & humorum dispositione pendet, sicut morborum diversitas. Tenuis humor ut plurimum acutos parit, crassus chronicos. Inter chronicos reponitur melancholia, quæ mentis alienatio est cum metu & tristitia. Hunc affectum generat cerebri dispositio cum pravâ sanguinis indole & partium inferiorum vitio. Suspirium frequens, somnia terrifica, silentium, demissio animi, desidia, he-

2

betudo, oblivio, lucis fuga, contemptus rerum omnium hanc comitantur ægritudinem. Hæc omnia arguunt crassioris ac terreni humoris dominium.

I I.

ANIMÆ proprium est cogitare. Inter eam & corpus insigne societatis vinculum. Ex diversis partium corporis motibus variæ exurgunt in animâ cogitationes, & vice versâ distinctæ cogitationes distinctos motus edunt in corpore. Mutuus ille concursus ex summi opificis decreto perfiscitur. Animi pathematis occasionem præbet humorum natura. Gaudium à laudabili sanguine & mediocriter subtili, dum blando ejus motu cerebrum placide commoveretur, unde grata animæ cõglatio. Furor, ira, audacia, rapidissimum bilis motum sequuntur. Mæstus & tristis est qui non posse se putat imminens malum arcere, aut optatum bonum consequi, propter imbecillitatem virium, motus inertiam, membrorum segnitiam. Unde hæc nisi ab humiore melancholico vix mobili spiritus obtundente.

I I I.

CORPUS humanum ex infinitis pene numero canaliculis unum efficitur. Per hos varii liquores trajiciuntur quorum alii utiles, alii excrementitii: illos sursum si tenses, deorsum si crassi, natura propellit. Ne credas tamen partes infernas spiritu orbari, hic actionum cujuslibet partis primus auctor. Inter liquores corpori inservientes debent esse temperies, partium moles, quantitas recto usui consona; secus corporis œconomiam interturbant. Morbi natura, partium conditio, earum situs, indicant remedii formam quantitatem, & quâ viâ fit eliminandus humor. Debet medicus naturæ minister & imitator illius motum sequi: sic

3

tenuis humor, si peccat, tum per habitum corporis, quo fertur, tum per superiora est abigendus, crassus tantum per inferiora.

I V.

QUO vividior alicujus corporis motus eo magis à centro recedit, motus sui impedimenta facilius superat, & lineam rectam describit: unde sanguinis è sinistro cordis sinu prorumpentis tenuior portio ad caput avolat, crassior pellitur ad inferiora. Hujus terreni succi sedes est ac receptaculum lien ac mesenterium cum eorum vasis. His obstructis moles sanguinea à succo melancholico non repurgatur, hinc circuitu sanguinis fæx illa rapitur ad diversas partes in quibus tam multa generat symptomata. Tot malorum curationem, natura monstrante viam, prudenter aggreditur qui confugit ad catharticum, sectâ prius saphenâ; hac semitâ quâ sponte fertur crassus humor citius, tutiusque foras educitur.

V.

OBSCURE loquitur qui catharticum sympathiâ aut antipathiâ agere, contendit; clarius qui affirmat idem irritando purgare, & novam excitando in humoribus fermentationem. Emeticorum & cathartorum actio discrepat, quod illorum evolutio fiat in ventriculo; horum dissolutio inchoetur in stomacho perficiatur in intestinis. Emetica constant particulis tenuibus & effervis, motuque concitatissimo præditis cerebrum lædunt vehementi concussione, partibus superioribus humorem melancholicum impinguunt potius quam ex iis eliminant ob angustiores meatus vacuandis succis crassioribus inepptos. Puta vomitum esse motum ventriculi non naturalem: is nunquam suscitatur absque periculo. Quæ per inferiora purgant minorem vim inferunt corpori, humo-

4

ris vacuationem naturæ consentaneam moliantur per
vias corporis patentiores, aptioresque expulsiōi crassio-
ris excrementi: à principibus partibus humorem noxium
remouent, sedem morbi oppugnant in abdomine sitam;
hinc melancholicâ percitis, apertio saphenæ, quæ cor-
pus à crasso sanguine repurgat, proficua: sicut hæmor-
rhoidum fluxus morbos melancholicos soluit.

Ergo in morbis melancholicis purgatio per inferiora.

DOMINI DOCTORES DISPUTATURI.

M. Ludovicus Labbé.

M. Ludovicus Peirier.

M. Petrus Mersenne.

M. Andreas Engueard.

M. Petrus Bonnet.

M. Joannes Garbi.

M. Josephus Thomasseau.

M. Joannes Baptista Moreau.

M. Paulus Courtois.

Proponebat Parisiis ANTONIUS VARIN, Parisinus
Baccalaureus Medicus. A. R. S. H. 1685.

Apud Franciscum Muguet, Regis & Facultatis Medicinæ Typographum.